



责任审校 周永红

熊治祁（4首）

临江仙·健章兄久居香港，思念同窗，嘱余为长沙市一中1964届高77班毕业照题词，情深意切，敢不从命

清水塘前无限梦，少年意气纵横。指星看月话前程。勇勤公朴训，风雨永铭膺。

六十年间如一瞬，关山难隔深情。而今两鬓已星星。凝神观旧照，微信祝遐龄。

注：勇勤公朴，一中旧时校训。

点绛唇·王陵公园湖边雅聚分韵得别字

何处寻幽，陵园夏日风光别。小山斜叠，松柏凌云洁。
荷盖婷婷，向晚飞蜂蝶。湖映月，满天澄澈，把酒酌空阔。

清平乐·书斋

人生如戏，早已忘名利。独坐芸窗消块垒，静对高樟苍翠。
壁间字画如新，薰茶饮罢来神。夜读闲书不倦，古今中外乾坤。

清平乐·读《辛弃疾集编年笺注》

忧愁风雨，总把英才误。十论美芹难动主，长剑倚天空舞。
豪吟慷慨纵横，江南塞北生平。忍看中原难复，登临有泪
如倾。

熊东遨（5首）

生查子·空庭独坐时值乙巳元宵

容易说团圆，容易传佳话。亲晤视频中，人坐桐荫下。
约得豆包来，结个联吟社。更有月相陪，不算空巢者。

卜算子·春半寄楚明兼呈沙湾诗聚诸子

君住市桥西，我住云山下。听水歌林友鸟鱼，别样亲风雅。
杯盏隔空呼，不必劳车马。饮到邻翁说醉时，月在中天挂。

鹧鸪天·楼居即事

欲把春光种上天，顶层闲辟小花园。相期次第云霞起，不
忌周遭雀鸟喧。

明月价，圣人言，问诗问酒乐为先。从新拾取耕荒笔，试
写桃源第二篇。

鹧鸪天·楼顶花园籀杜鹃

根在尘寰梦在天，楼端尺土认家园。寄身高处寒能敌，知味清时语不喧。

红紫合，色空全，野僧蛮女各留言。群芳尽入神仙谱，花叶同形只一篇。

清平乐·春半桃源行同弘陶清角中华

管蛙琴鸟，乐奏霜天晓。莫谓知音当世少，溪畔陶公来了。

繁英续记前缘，野潮联动心弦。会到此中真意，毋需更问神仙。

吕可夫（5首）

浣溪沙·巴东无源洞

洞谓无源水有渊，滔滔涌泻不知年。神奇故事代相传。

诗酒风流思寇令，山林瀑响起寒烟。白云亭下诵遗篇。

浣溪沙·夜宿巫峡天街云中山庄，时值乙巳五月十五

月硕星明手可摩，夏虫唧唧闹鸣多。山风响叶影婆娑。

峡口猿声随远水，巴东灯彩璨长河。云中梦踏竹枝歌。

浣溪沙·《相思遥》舞印象

云舞羽衣水袖飘，蜂飞柳摆小蛮腰。莺轻歌软《念奴娇》。
春日花篱思扑蝶，秋湖月夜忆吹箫。江南烟雨梦思遥。

临江仙·神农溪

高峡湖平溪涨水，抬高百里神农。楼船划破翠云峰。犁头
悬壁浪，扑面峡江风。

夹岸青山排队列，鳧飞鹭翥西东。土家歌舞鼓声雄。心迷
诗境里，人醉画图中。

贺新郎·敕勒川

大野穹庐望。碧连天、苍烟无尽，莽云难丈。马奔雕盘牛
羊壮，悠远胡歌高唱。闻笛管，频生惆怅。画角刁声犹在耳，
叹当年多少伤心仗。闺梦泪，戍夫帐。

可怜骨白沙场上。到头来、荒坟荆掩，断碑苔葬。只有山
河千万载，谁记雄兵名将。息战伐，方能休养。幸得今朝春风好，
遍毡包朔漠花豪放。茶酺煮，酒新酿。

周永红（5首）

贺新郎·观府谷寨山遗址感怀

华夏源头数，溯黄河，寨山遗迹，史前遥绪。城邑农桑陶甄久，万古礼仪初祖。望府谷，千年雄踞。秦汉烽烟唐宋月，奋兜鍪，迭代驱强虏。折氏子，气吞虎。

刀枪入库经猷举，喜明时，诗书稼穡，英贤踵武。林草堆青膏腴地，邀醉故人鸡黍。海红果，遐方驰誉。冶铁乌金工矿集，辟园区，塞上开瑶圃。富陕北，裕西部。

鹧鸪天·白虎堂品茗

阆苑仙株发异香，武陵源里久珍藏。烟云毓秀黄金叶，山水钟灵白虎堂。

烹茗汁，沐兰汤。更拈野趣入茶缸。索溪峪口餐霞气，颐养天年葆寿康。

八声甘州·老河口聆黄河大合唱

听黄河咆哮挟风雷，天上遣神兵。越雪山草地，青纱帐里，秣马连营。端起洋枪土炮，拔剑指东瀛。铁血驱强虏，赤帜高擎。

洗尽百年耻辱，喜星移物换，海晏河清。看荆襄大地，雅乐奏歌笙。老河口，鲜花五月，颂屈原，犹作警钟鸣。冲霄汉，朗吟高唱，大振天声。

沁园春·过常州怀东坡先生

鲤对眉山，骏发京都，旦夕沉浮。便天涯海角，漫吟宦辙，江南岭表，笃念常州。卜宅毗陵，买田阳羨，喜与溪山结侣俦。藤花里，歇芒鞋竹杖，卧榻归休。

大江犹自东流，送雪浪、坡翁来舫舟。起铜琶铁板，铿锵词骨，天容海气，壮阔吟眸。明月逢时，海棠映日，洗砚池边诗绪稠。顾塘畔，更笔余山色，画意难收。

八声甘州·怀柳子厚

听壶城犹响大唐音，户诵彻鱼峰。想峨山登陟，城楼风雨，薜荔芙蓉。千古文章老处，帙重柳河东。最爱诗中画，江雪渔翁。

忆昔释奴解缚，更开荒凿井，肇造黉宫。尽解纾民困，棠荫积芳浓。引归思，黄蕉丹荔，肃衣冠，百越踵遐踪。柑香伴，罗池俎豆，八桂清风。

张建明（3首）

醉花阴·暑事

伏案冰山销永昼，欲敌炎阳兽。无福享空调，蒲扇频摇，汗浸轻纱透。

欢娱每每图成后，有小凉盈袖。忽满耳蝉声，催下重帘，怕得山容瘦。

清平乐·立夏

蔷薇夜放，春老新阴壮。黄口枝间飞踉跄，呼取扶将愿望。
惯看序易年年，时轮转替连绵。忽有小儿追问：不知夏立
何边？

高阳台·麓山晚眺

栋宇争高，江天共碧，参差百万人家。携客来登，凭风写
作生涯。归鸿且向南汀歇，入南汀、梦惹芦花。更萦心，涓涓平波，
隐隐残霞。

当年老杜知何处？剩晓行湘水，夜宿长沙。人物双非，而
今俱到清嘉。灯张竟幻连城火，解词囊，怕起长嗟。便呼儿，
就地支炉，舀水烹茶。

谢宏治（3首）

好事近·乙巳元宵

石上瞰江澜，槛外素娥沉碧。谁物谷纹千里，送数声悠笛。
雁城情动醉花灯，人沸锦尘陌。且借玉壶清影，醉一街行客。

破阵子·乙巳端午追怀

古树垂阴曳暑，绿波揉碎浮光。逐浪龙舟翻雪练，两岸人
喧沸楚乡。粽香投碧江。

天问裂空九宇，怀沙沉血三湘。纵使孤忠无觅处，犹有骚
魂动八荒，云开山水苍。

水调歌头·乙巳新春

元日霞光涌，梅萼绽枝头。青红留醉双塔，桃浪唱渔舟。
石鼓书声萦耳，回雁轻烟积翠，佳境妙衡州。更有岳山雪，相
伴白云悠。

曹春华（3首）

醉花阴

黄花开在重阳后，深把秋来嗅。香在有无中，时浅时浓，
归去还盈袖。

人间故事皆非偶，夜至灯依旧。何以寄平生，明月松风，
一盏清欢酒。

沁园春·持鸿道长邀饮

一盞凝香，十年陈酿，绿蚁争浮。对二三知己，倾怀畅饮；
满园夜色，秉烛同游。柳正依依，月仍皎皎，且喜闲身揽自由。
笑谈里，把时光虚度，沉醉方休。

任他斗转星流，将利禄功名壶底收。偕琴箫作伴，歌吾所志；
云霞入望，美尔如鸥。弹指人生，摧心故事，多少尘中不解愁。
欣此刻，握清欢在手，还复何求。

临江仙·安庐花在间访友

七夕倏然成往，中元又到黄昏。红尘误却百年身。久烦浮
世客，来访素心人。

竹里静藏幽筑，花间自有仙邻。一壶秋色一壶春。坐深驹
隙浅，起看麓云新。

雷凡（2首）

蝶恋花·分韵得“已”

绿满层山青满地，流水溪桥，隐约黄花里。枝上雀儿声不已，
空中日暖雨刚霁。

酒后人慵无所事，村北村南，信步无穷味。忽有惊雷天际起，
三春晴雨同儿戏。

蝶恋花·分韵得“鸟”

柳媚桃红青绿草，吹面风和，行处勤蜂早。野径无人声悄悄，
高低瓦舍晴山绕。

溪畔菜花香万缕，客正酣时，啾呀啼黄鸟。历尽暑寒人半老，
平生最喜春天好。

李瑞河（1首）

鹧鸪天·重过兰亭

兰渚山前发浩歌，觞流九曲不辞多。香樟叶密啼黄雀，池
水波平泛白鹅。

晴日朗，惠风和，十三年后又经过。茂林修竹依然是，人
事消磨奈几何。

李雄中（1首）

莺啼序·汶川漩口中学地震遗址凭吊

群山四围叠嶂，洞中车行许。抵映秀、漩口黉门，满目疮
创如诉。断垣处、依然可辨，当时学子攻书处。叹残楼底下，
犹埋廿六窗侣。

地裂楼摇，柱倾梁断，竟霎时魔舞。更谁料、朗朗书声，

顿成生死陌路。想当时、天昏地暗，更多少、呼儿寻父。最堪怜，
花样年华，瞬归尘土。

捧花缓迈，绕址低徊，碑前默然伫。深几鞠、泪盈眶睫，
无限心绪，默祷虔诚，此情谁赋？魂兮安息，生当珍重，人间
大爱长相护。愿从今、灾祸永停步。

家园重建，岷江依旧东流，青山又披妍妩。时光荏苒，
十七年过，尚痛萦肺腑。这次第、愁凝诗句。惨烈如斯，震恸如斯，
怎生挥去？天灾剧烈，人心坚固，一方有难八方助。看如今、
新校花千树。唯祈亡者长安，生者刚强，国宁民富。

罗金龙（2首）

水调歌头·访韶山灌区感怀

十万愚公力，十月建殊功。银河飞渡，冲天豪气起湘中。
送走千年旱涝，挑出万家幸福，南北干渠通。日夜清波涌，从
此米粮丰。

志难移，情不减，景相融。源头活水，利人泽物润无穷。
长把灌区玉带，系作民生保障，儿女感恩同。座座青山在，揖
手拜英雄。

满江红·读《剑南集》咏陆游

慷慨平生，英雄气，壮怀激烈。念中原、胡尘万里，蛮烟无歇。满地腥膻残照起，何人自毁长城铁。好男儿，为国戍轮台，增华发。

园上柳，飞绵雪；池上水，流清冽。忆钗头凤杳，镜湖风月。老去山阴心缱绻，示儿一语情悲切。算放翁，终古国魂存，真雄杰！

聂韵华（4首）

蝶恋花·忆张公赠颜真卿《多宝塔碑》

报纸字头临复往，稀里糊涂，不见些微长。求学之途多阻碍，一时气泄心迷惘。

隔壁张公知此状，遗我家藏，法帖心灯亮。“道法从来当取上，诗词歌赋文来养！”

蝶恋花·买笔

五十年前回趣事，脚下生风，树荫苍苍翠。五一“墨华斋”店至，徘徊货柜三三次。

小小标签标价示，十八薪资，花了三元置。三寸羊毫为利器，忻成“五合”随心意。

蝶恋花·惜纸

记得太平街集市，三角三分，十页毛边纸。裁出八开装订起，半张海报当封底。

寸楷端庄求得势，行距中间，小楷蝇头丽。翻个边来书大字，鲁公筋骨精神气！

蝶恋花·光

七十年代，有幸拜朗翁周达先生学习诗词和书法。先生家住溁湾镇西红泥山上，周末下班后携作业前往请教，每每到很晚，老师担心安全，亲自打着手电送我，感动至深，铭记于心。

柳荫湖边空气爽，周末如期，欢快师家访。仙宅红泥山上仰，自卑起步精神长。

气宇轩昂京戏唱，水墨丹青，粒粒葡萄壮。作业批完时一晃，月光手电双双亮。

求灿霓（1首）

鹧鸪天·荷

伞举流云一尺青，凌波亦自照亭亭。塘前雨歇初凝露，月下风来更适情。

缘一脉，孰相轻，蓬房结子血连茎。可怜白臂空心藕，偏是新荷死后生。

田翔玲（3首）

鹧鸪天·写春联

花落花开又一年，张灯结彩写春联。笔端逸趣通灵境，纸上风华满画轩。

儿递墨，婿铺笺。凝眉阿母仄平研。牵衣最喜孙娇俏，追讨新春压岁钱。

减字木兰花·打工者

霜尘满袖，几载奔波人渐瘦。冷月孤舟，独向天涯作远游。
乡思如酒，醉里凭栏眉暗皱。未肯言休，戴月披星盼暖秋。

浣溪沙·风过莲塘

雨浣青萍叠翠钱，粉荷初绽半遮颜。蝶衣轻扑水云间。
香暗随衣萦客袂，影犹衔绿漾晴澜。回头已隔几重烟。

魏勇（1首）

菩萨蛮·秋

秋波已共秋风起，秋心化在秋阳里。秋梦忽成堆，秋云唤不回。

秋庭飞落叶，秋绪千千结。短笛一声秋，秋蝉白了头。

文永龙（2首）

水调歌头·桃江一中校园即景抒怀

好景觅何处，春入桂花园。园中花榭芳径，更有树参天。
绿掩层楼精舍，红照廊亭场馆，气派自超然。声振气尤畅，学
子竞攻坚。

嘉桃李，仰梁栋，忆当年。湘山发轫，创校兴学冒烽烟。
历尽诸多风雨，奋激诸多俊彦，道脉总承前。屈指数名校，此
苑每争先。

蝶恋花·悼胡友平女史

非是豪怀期壮举，善念慈心，原是柔情女。只是临危无所惧，
挺身敢把平安护。

定格青春犹眷伫，魅力姑苏，今又赢芳誉。遥祭贞魂情万缕，
血花璀璨英雄树。

萧志国（3首）

鹧鸪天·卜居岭踏春

雾卷云纱叠翠巅，山厨新火起岚烟。石磨旋雪调春韭，竹
甑蒸霞熟蕨拳。

松菌滑，水芹鲜。瓦盆盛得一山喧。漫扶藜杖穿花去，半岭莺声落醉肩。

西江月·采藜蒿

湿地泥融日暖，芦汀风曳春韶。蒿尖嫩绿涨溪桥，好引村姑争俏。

素手轻沾玉露，纤云暗拂蛮腰。一篮翠影衬眉娇，笑踏夕阳归棹。

西江月·访蔡世平先生之南园

吩咐一山草绿，流连四野花香。晚蛙题句闹南塘，几处莺喧鹭唱。

秋月老藤瓜晃，虫花嫩叶丝长。乡音浓淡菜根香，尽是词家情状。

谢良健（1首）

满江红·瞻石洲金钟山

翠嶂连绵，石洲地、英魂长护。纪念碑，巍峨耸立，永铭心腑。四位英豪名刻石，千秋伟业洪炉铸。眺山前、田舍绕云烟，情难负。

风带泪，云含怒。松柏茂，思如缕。忆当年，血染九峰高处。烈士精神昭日月，丹心璀璨迎前路。愿山河、锦绣永如春，人同赋。

谢紫云（5首）

鹧鸪天·乙巳立春

处处灯红别样装，纷纷梅落满溪香。风中柳舞初开眼，座上情真共举觞。

春正绿，鬓先霜。年将奔八又何妨？不嫌诗瘦但求乐，独爱孤吟对夕阳。

浪淘沙·那年

旧日画桥边，岸柳拖烟。夕阳垂地晚晴天。草长莺飞花竞艳，彩蝶翩翩。

好景且凭栏。柳拂星寒。夜深灯火已阑珊。月白江清双照影，正值华年。

鹧鸪天·乙巳春游七星村樱花园

梦幻乡间第一园，风流不尽胜桃源。浅红深紫频翻浪，韵雅香清半入云。

山叠叠，水粼粼。斜辉瑞色满乾坤。纵横十里花如海，醉了游人富了村。

浣溪沙·碧泉村第三届花朝节采风随笔

花海无端天尽头，香腮金甲弄春柔。晴辉洒落照清眸。
二月碧泉开画境，一番花信逞风流。花朝节庆动潭州。

浪淘沙·题陈家洲鸟岛

剪浪载舟行。水暖风轻。芳洲难觅鸟啼声。雨湿长藤缠老树，
小路花明。

万里一江清。静看云生。林外平桥水面横。忽见低飞鸥鹭远，
动了诗情。

钟宇（5首）

踏莎行·宝莲西湖

碧水澄心，清风浴面。荷衣舞处红摇乱。银鸥数点落沙汀，
夕阳揉碎西湖畔。

客子歌飞，大田情暖。烟纱薄织诗无限。湖中一石起涟漪，
圈圈渐作乡愁散。

水调歌头·春日庆丰湖赏景

峰如仙子髻，水若美人眸。湖平疑是明镜，风皱绿丝绸。
吹面梨云杏雨，复有桃红点额，蜂驻蝶勾留。花月相招引，冠
履赴清游。

意通禅，山化佛，翠含幽。野蹊香径，鸥曲委婉燕声柔。
远处扁舟轻漾，近里涟漪渐扩，彝舞解乡愁。今作此中客，胜
过在瀛洲。

贺新郎·游赣县白鹭古村

山水悠悠处。入吟眸、赣江如练，烟汀嬉鹭。灰瓦朱檐情
依旧，曾历沧桑几度。遍卵石、参差曲路。老树荫垂人聚散，
夜风轻、欲作呢喃语。更说尽，今和古。

好凭生态兴文旅。绕村郭、溪长柳细，软丝柔缕。阡陌纵
横丹青卷，漫写春朝夏暮。问村史、同谁相叙。聊发乡愁难自释，
绣花楼、期与知心遇。遽尔至，悄然去。

沁园春·咏璞心岛

绿曳平湖，蓝拖抚水，翠涌璞心。看长堤如带，随波起伏；
瑶花似锦，遍地萧森。烟屿凌澜，晴沙落照，剪影江中戏水禽。
黄昏里，摇悠悠木棹，谁作低吟。

蓬莱美景何寻。入此处、渐臻化境深。任水湄叠墅，柳边

把钓；曲桥拱月，绣陌铺金。野径通幽，轻车载梦，几瓣飞花落我襟。依稀听，有人家好客，呼唤光临。

沁园春·余干大明花海

信水之湄，鄱湖之畔，春雨乍晴。正蓼花点缀，绯衣溅绿；熏风缱绻，绣陌闻莺。蝶起翩跹，蜂飞自在，似比游人解盛情。徘徊处，有浪翻花海，馥郁横生。

且沿香径徐行。见妩媚、不禁心已倾。或紫成君慰，蓝酬我愿，朱来应梦，黄自通灵。绮榭栖烟，回廊浮雪，发染湖光几尺青。过来便，觉浑身抖擞，气爽神清。

黄波（5首）

临江仙·夏至

绿筠含粉荷香漫，云轻染透晴空。立竿无影爱无冬。艳阳如瀑布，绚烂我眸中。

浮名淡若烟霞外，平生惟守从容。茫茫人海幸相逢。心间存挚爱，幸福已融融。

临江仙·森林

伟木昂头瞻日月，深根四处盘龙。新枝古干共春风。露花迷小鸟，苔色润幽踪。

厚土无私生万物，何分桃杏杉松？蜜蜂蝴蝶笑谈中。自能容野兽，不必在囚笼。

江城子·挑山工

嶙峋石径入云长，步匆忙，偶踉跄。盐渍衣衫，肩上汗巾黄。纵使辛劳难退却，肩上担，一家粮。

怜君身上旧新伤，鬓边霜，九回肠。午夜梦回，清泪忽成行。独立苍茫心若割，轻叹息，著文章。

行香子·贺麓隐诗社成立

暖雾晴岚，旧雨新朋，健身步道并肩行。不排座次，懒得逢迎。咏一溪花，一帘月，一湖清。

池中菡萏，知君向往。竹林风，懂我痴情。朝阳喷薄，浅笑盈盈。便最温柔，最纯粹，最光明。

卜算子·朱张会讲

朱子莅长沙，急下南州榻。满腹诗书待圣贤，何必登华纳？君问世间痴，我有如流答。富国强民志士心，仍在清风峡。

赵海燕（3首）

夜行船·冬月初一泛舟清水江

耽搁江湖还久。立桅台、水摇人后。邈闻银管弄低回，尽已痴、恍风拍袖。

楼影移、流光剔透。浮桥远、昊苍无垢。旧年懵懂一笑中，换冰心、续杯可否？

湘江静·赋“大江”

日夜流将随月秀。试清辉、玉人纤手。开轩荐鲙，临风压酒，付诗心消受。自古数惊才，须听水、滔滔挥就。鸥吟已歇，潮声渐起，还向北、吐吞久。

鬓易霜，思复旧。况洪流、浩汤难朽。星垂两岸，天连一渚，仰千年山斗。汽笛向横塘，风流在、海田知否？余波不舍，尘埃已静，英雄皓首。

高阳台·有寄

抱膝楼中，凭肩梦里，韶光倦了人心。西望持觞，销魂此际谁禁。潇湘碣石寻无路，向阳关、几叠低吟。到春深、未踏兰舟，已湿兰襟。

十年检点荒唐罢，数中年故事，日见消沉。听雨前宵，桐花声落弦琴。劝君暂醉升平世，管明朝、风月晴阴。愧而今、老了容颜，辜负钗簪。

李春梅（2首）

虞美人·春风又

频年消息咨元父，总是东风主。小园昨夜又梅开，依旧殷红万点、照人来。

愁云且作流沙散，湖海龙蛇换。鼓歌觞咏透重帷，更有一天花火、秀春回。

摸鱼儿·今夏多洪涝

最无情、弥天风雨，晨昏咆哮呜咽。昏昏八表洪澜动，骤起骊歌千叠。摧复折。伤绮陌、鱼龙殒梦魂魄夺。繁华虚设。只蝼蚁生涯，浮沉时刻，悲恨凭谁说？

苍生泪，又卷鲸波如雪。遑论相合相悖。自然之怒哀何极，中有死离生别。因果结。看反噬、经年造化都成缺。思量前辙。祈大劫归来，关河无恙，早领御龙诀。

刘国辉（5首）

浣溪沙·雨后

雨后晴阳百卉妍，馨风拂到野村前，弄春儿女醉春烟。
撷个花香萦袖底，放些诗梦上高天，小诗写到白云边。

南歌子·旧屋

辗转人潮走，蹒跚世路穿。人生百味忆当年，阅尽繁华不比旧家园。

岁月无穷尽，风云有变迁。情怀依旧总心牵，这水这山这路这炊烟。

清平乐·小背篓

（宋祖英歌曲《小背篓》诗词试译）

圆圆背篓，勒紧妈妈手。吊脚楼前山路口，背我赶场常走。
难忘小我童年，几回酣睡娘肩。多少山歌惯听，至今回味无穷。

清平乐·暑夜闲吟

天风如火，拂上城楼左。热浪来回频袭我，熏得心门紧锁。
近来温度偏高，书斋懒得挥毫。弄个词儿取乐，降些暑夜高烧。

减字木兰花·夏日黄昏

夏荷新竹，雨后新枝摇翠绿。雾幔藤帘，鸟过山门野趣添。
轻风抚首，阵阵清香如醉酒。俚语诙谐，拾得些些入韵来。

胡暉（4首）

青玉案·夏日久雨停云

潇湘最是谙寒暑，那时雪、今时雨。雨后骄阳明暗许。百川争赴，千山难阻，排浪东流去。

此心偏记来时路，纵化浮云要归楚。势卷天风浑不顾。一时情急，北峰南浦，没个商量处。

青玉案·安化绿茶

雪峰山下清明雨，晓岚碧，旗枪吐。竹篓谁家盛玉露。湿将春袖，风徐蝶舞，一路追香去。

何时约得檐前煮，却恐扶杯两无语。愈惹闲愁生几许。那年青涩，远如烟树，料隔无重数。

定风波·观沅江小河咀美丽乡村鸬鹚

摇橹纤纤月影长，芦花数载过鱼梁。应念同舟风雨里，何计，殷勤频佐捕鱼郎。

今日村中渔暂歇，休说，罾丝尘网搁新墙。犹替东篱留客久，搔首，凌波几作御风翔。

清平乐·乡村四月

耕牛闲了，漫嚼青青草。雨霁蜻蜓池上绕，应喜小荷刚好。邻翁垂钓桥东，绿杨今已荫浓。高铁山腰飞过，任凭来去如风。

赵秀敏（5首）

虞美人·夜寄

光阴转瞬飞花落，尘世欢情薄。春愁春恨只无言，唯有风儿为我、解连环。

更深月影移窗外，试手寒罗带。一颦一笑暗思量，任是天南天北、两茫茫。

朝中措·蔷薇花开

轻红嫩粉玉玲珑。好醉一帘风。满架蔷薇花下，时光脚步匆匆。

江南行遍，归来燕子，不做飘蓬。我有新茶半盏，为君暂释情浓。

离亭宴·过鸭绿江断桥

碧波清未了。看隔岸、芳林匝道。犹叹风清天气好。正忘我、倚栏烟渺。最忆跨江鏖战，千里阵云谁扫？

听尽低吟朗啸。望不尽、山河岭表。桥断桥横江月小。看浪涌、痴心未老。逝水几多回忆，梦落烟汀林杪。

水调歌头·至高邮谢郎兄邀诸师长相聚

晚照映天澈，激荡一湖风。云帆万里思发，振翅过飞鸿。天际苍茫难认，碧水沉浮千古。何以问游踪。与我话淮海，身世转飘蓬。

运河柳、花堤树、竞玲珑。一山一水，遥遥尘海觅词宗。把酒欢言未了，更响清歌彻夜，曲尽意难终。归抱赠书读，清气溢心胸。

水调歌头·和长青雅集

笑语清风爽，花气透明轩。遥遥人海相属，重见兴依然。一念波澜早定，万里浮云散去，指顾忘何年。借得凌云笔，挥洒助清欢。

盟白鸟，飘金桂，遣青鸾。炎凉看罢，赤子情意暖清寒。玉树芝兰行处，天地风霜不染，忘我两陶然。月夜归来晚，检字此心安。

唐凯（1首）

踏莎行

峦岭风吟，江源奔迅。稚儿初领登临韵。千竿翠玉正翎新，
涤身悬瀑云崖震。

问甚功名，山君影遁。百千万事樽前杖。淤衫且褪付鸣泉，
翻云无碍埋牙笋。

蒋磊明（2首）

八声甘州·乙巳夏至后一日，与木公、夫子、白跑堂
同谒彭刚直公墓。墓与庐大体完好，然墓碑及
龕所荷碑石均无存，翁仲头颅亦缺失

是何年草草濯长纓，归卧旧山林。见丘峦环拱，磴梯峭拔，
折入层阴。与客同来宿雨，底事泣青岑。风景非殊地，聊慰登临。

忍问轻身龕所，感殊勋勒石，碑重难禁。念妻梅心意，真
幻有交侵。忆儒冠、彭郎砚上，看小姑、檣櫓渐销沉。归来也，
随阳雁外，岫隐云深。

临江仙·零陵朝阳岩

烟外西岩危竦，镜中潇水清冷。朝阳涂抹露晶莹。摩崖多
剥蚀，柳影挂空灵。

元子当初歌曲，濂溪几度山铭。犹闻欵乃水云轻。未休川上峙，看尽楚南行。

唐江初（4首）

渔家傲

独坐山亭风雨至，屏前轻点痴游戏。耳畔莺声何故起，应无忌，得时且恋高枝翠。

谁道拿云能奋翅，折腰斗米终难弃。几点宏图归梦寐，空自喟，忧时忧世身心累。

鹧鸪天

漫逐流云笑变迁，虚名蝇利梦三千。百般世态何堪赏，一点风情剧可怜。

难问舍，易求田。疏篱草舍合参禅。人间正是凄迷绿，拾取芳菲忆少年。

临江仙

事业无非俯仰，登临亦似寻常。斜晖渐隐水云长。短篱闻鸟语，深院嗅花香。

白首犹羁旅次，青葱或恋春光。匆匆来去亦文章。疏钟惊客梦，布袋作行囊。

临江仙

草上蜂飞蝶戏，江头鹭掠舟翔。山鸡畦畔嗅泥香。小荷擎伞绿，嫩竹隐花黄。

挥笔应痴散淡，劳弦或在汪洋。数声归鸟唱晴光。经年常作客，一梦到潇湘。

石选华（2首）

临江仙·游邵阳县天子湖

碧浪无垠天子水，波光落照粼粼。芙蓉出水举荷频。青峰梳倒影，月色洗湖滨。

滚滚浪花船尾雪，江山极目堪文。临风把酒气怡神。鲲鹏高展翅，骐骥任扬尘。

浣溪沙·乡村秋景

漠漠轻寒晓雾仙，朝阳黄叶碧云天，满江秋色小山前。

村落百年风里老，牛羊闲草稻收田，青砖乌瓦淡炊烟。

汤暉章（2首）

定风波·商品今昔

队里当年聚会场，拈阄碰运没商量。邻里亲情全不顾，何故？凉鞋票仅两三双。

今日桥南商铺挤，惊喜，层层产品满千仓。种类般般皆拥有，回首，应知改革是良方。

临江仙·沉江赤山樟抱蜡

历劫风霜无数载，冷观世态炎凉。六围难抱伞儿张。人间多少愿，都在叶中藏。

太息年年千万籽，依然孤独凄凉。邻家送个蜡儿郎。如同亲骨肉，一样慰衷肠。

蔡聪（1首）

一萼红

记无聊。对繁花零落，似又把人抛。望断青山，啄残红豆，五翳楼阁岿峣。捋一片、离愁别绪，问绮怀、心事却难消。仆射情余，司勋梦醒，都在蛮腰。

怅我浮生草草，将清冷月色，笼住江潮。袂褰沉吟，琅嬛

秘泄，遐思万里飞飙。恁次第、凉风破闷，倩冰瓯、雪乳卷银毫。
误作韦郎款曲，独坐深宵。

袁爱华（1首）

临江仙·秋览矮寨大桥

日色已秋霜未语，层峦叠影千峰。流泉飞瀑落孤松。望高
何处是？天路几重重。

寨共人文书万古，半空腾跃长龙。丹青染就比诗浓。敞迎
山外客，唱响世时钟。